

2534-11/21

Ugovorni organ Javna ustanova Opća bolnica „Prim. dr. Abdulah Nakaš“, ul. Kranjčevićeva broj 12, Sarajevo, koju zastupa v.d. direktor Prof. dr.sci.med Ismet Gavrankapetanović (u daljem tekstu: Naručilac)

i

PROMA d.o.o. Sarajevo, ulica : **Kasindolska 33, 71000 Sarajevo**, ID broj: **4200174650008**, transakcijski račun broj: **1941410171000115** otvoren kod **ProCredit** banke dd Sarajevo, koga zastupa direktor **Mirza Durmišević** (u daljem tekstu: Dobavljač)

sklopili su sljedeći

OKVIRNI SPORAZUM ZA NABAVKU USLUGA

UVODNE ODREDBE

Član 1.

Na osnovu provedenog otvorenog postupka s namjerom sklapanja Okvirnog sporazuma za nabavku usluga: **Preventivno i interventno održavanje medicinske opreme proizvođača: GETINGE** u trajanju od **2 (dvije) godine**, provedenog na osnovu člana 32. Zakona o javnim nabavkama („Službeni glasnik BiH“ broj 39/14), Ugovorni organ je kao najpovoljniju ponudu, u skladu sa postavljenim kriterijem za dodjelu okvirnog sporazuma, odabrao ponudu ponuđača **PROMA d.o.o. Sarajevo** broj: **21-010-1404** od **18.04.2021.** godine.

Obrazac za cijenu ponude sa jediničnim cijenama odabranog ponuđača je prilog ovog Okvirnog sporazuma i čini njegov sastavni dio.

PREDMET I TRAJANJE OKVIRNOG SPORAZUMA

Član 2.

Predmet ovog Okvirnog sporazuma je utvrđivanje uslova za sklapanje ugovora o nabavci usluga: **Preventivno i interventno održavanje medicinske opreme proizvođača: GETINGE** (u daljem tekstu: pojedinačni ugovori) između Naručioca ili Dobavljača.

Količine navedene u Obrascu za cijenu ponude iz člana 1. stav 2. ovog Okvirnog sporazuma su okvirne i zavisit će o raspoloživim finansijskim sredstvima i potrebama Naručioca.

Dobavljač se obavezuje da će vršiti usluge u skladu sa tenderskom dokumentacijom, narudžbenicom od strane Naručioca i svojom ponudom.

Član 3.

Okvirni sporazum se zaključuje na period od **2 (dvije)** godine.

Na zahtjev Naručioca, Dobavljač će sa istim zaključiti ugovor i izvršiti usluge, pod uslovima određenim ovim Okvirnim sporazumom do njegovog isteka.

SKLAPANJE UGOVORA NA OSNOVU OKVIRNOG SPORAZUMA

Član 4.

Kada se utvrdi potreba za vršenjem predmetnih usluga, sačinjava se specifikacija i spisak usluga sa potrebnim količinama na osnovu koje se izrađuje Ugovor po okvirnom sporazumu za konkretnu nabavku.

Odsjek za javne nabavke sačinjava Ugovor u skladu sa odredbama okvirnog sporazuma, tenderske dokumentacije i ponude, te poziva ovlaštenog predstavnika ponuđača da izvrši potpis ugovora.

Nakon obostranog potpisa ugovora dva primjerka se dostavljaju ponuđaču, a dva se zadržavaju kod ugovornog organa.

U slučaju povrede ugovornih obaveza nastalih potpisivanjem Ugovora u okviru Okvirnog sporazuma, Naručilac može raskinuti ugovorni odnos pisanim putem ili na drugi dokaziv način.

ROK IZVRŠENJA USLUGA

Član 5.

Usluge će se vršiti tokom trajanja Okvirnog sporazuma u skladu sa potrebama ugovornog organa u obimu koje će se odrediti prilikom svake usluge.

Rok za izvršenje usluge je **6 (šest) sati** po pozivu Naručioca, odnosno u dogovoru sa Naručiocem.

MJESTO IZVRŠENJA USLUGE

Član 6.

Usluge koje su predmet nabavke će se vršiti u Javnoj ustanovi Opća bolnica "Prim. dr. Abdulah Nakaš", Kranjčevićeva broj 12, Sarajevo.

CIJENA

Član 7.

Okvirni sporazum se zaključuje na period od 2 (dvije) godine i traje do isteka sporazuma odnosno do utrošene maksimalne finansijske vrijednosti

Ukupna vrijednost Okvirnog sporazuma bez uračunatog iznosa na dodatnu vrijednost na dvogodišnjem nivou na iznosi **198.553,30 KM**

(slovima: **stotinudevedesetosamhiljadapetstotina pedesettri i 30/100 KM**) odnosno sa uračunatim iznosom na dodatnu vrijednost na dvogodišnjem nivou iznosi **232.307,36 KM** (slovima: **dvijestotinetridesetdvijehiljadetristotinesedam i 36/100 KM**)

Vrijednost norma sata:

- Cijena bez PDV-a: **73,00 KM**;
- Porez na dodanu vrijednost (PDV 17%) = **12,41 KM**;
- UKUPNA VRIJEDNOST / CIJENA sa PDV-om = **85,41 KM**
(slovima: **osamdesetpet i 41/100 KM**).

Finansijska sredstva za predmet nabavke obezbjeđena su u skladu sa Posebnom odlukom v.d. direktora Bolnice broj 2534-2/21 od 10.03.2021. godine,.

Jedinične cijene su nepromjenjive tokom primjene Okvirnog sporazuma i utvrđivat će se na način opisan u tenderskoj dokumentaciji za ovu nabavku.

Svi ostali uslovi zaključenog Okvirnog sporazuma su također nepromjenjivi tokom njegove primjene.

ROK PLAĆANJA

Član 8.

Naručilac je dužan obaveze po računima platiti Dobavljaču uplatom na njegov žiro račun, u roku **30 (trideset) dana** od dana ispostavljanja računa za uredno izvršenu uslugu.

ODGOVORNOST ZA MATERIJALNE I PRAVNE NEDOSTATKE

Član 9.

Dobavljač odgovara za materijalne nedostatke stvari / opreme (hardver / softver) koje je ona imala u času prelaza rizika na Kupca, bez obzira na to da li mu je to bilo poznato. Dobavljač odgovara i za one materijalne nedostatke koji se pojave nakon prelaza rizika na Kupca ako su posljedica uzroka koji je postojao prije toga. Neznatan materijalni nedostatak ne uzima se u obzir. Šta se podrazumijeva pod neznatnim materijalnim nedostatkom zajednički / komisijski utvrđuju Kupac i Dobavljač. U obavijesti o nedostatku stvari / opreme Kupac je dužan potanje opisati nedostatak i pozvati Dobavljača da pregleda stvar / opremu. Ako obavijest o nedostatku koju je Kupac blagovremeno poslao Dobavljaču preporučenim pismom, telefaksom ili na neki drugi pouzdan način, zakasni ili uopšte ne stigne prodavatelju smatra se da je Kupac izvršio svoju obavezu da obavijesti Dobavljača. Nedostatak postoji ako ugovorena / isporučena oprema / stvar nema svojstva i odlike koje su izričito određene ovim ugovorom. Dobavljač odgovara i za nedostatke koje je Kupac mogao lako opaziti ako je izjavio da stvar nema nikakve nedostatke ili da stvar ima određena svojstva ili odlike.

Dobavljač odgovara ako na isporučenoj opremi / stvari (hardver / softver) postoji neko pravo trećeg koje isključuje, umanjuje ili ograničava pravo Kupca, a o čijem postojanju Kupac nije bio obaviješten, niti je pristao da primi stvar opterećenu tim pravom. Ukoliko se pokaže da treća osoba polaže neko pravo na ugovorenu opremu / stvar, Kupac je dužan obavijestiti Dobavljača o tome (obaviještenje se vrši na način iz prethodnog stava ovog člana - preporučeno pismo ili telefaks ili neki drugi pouzdan način), izuzev kad je to Dobavljaču već poznato, i pozvati ga da u razumnom roku oslobodi stvar / opremu od prava ili pretenzije trećeg ili da mu isporuči drugu stvar bez pravnog nedostatka. Ako Dobavljač ne postupi po zahtjevu Kupca, okvirni sporazum se raskida.

UGOVORNA KAZNA, ZATEZNA KAMATA

Član 10.

U slučaju kašnjenja u izvršenju usluga Naručilac će zaračunati i naplatiti Dobavljaču na ime ugovorne kazne iznos od 1% ukupne vrijednosti usluga čije izvršenje kasni za svaki puni dan zakašnjenja počev od prvog dana docnije do maksimalnih 5%, ukupne vrijednosti / cijene Okvirnog sporazuma.

Naručilac ne može zahtijevati ugovornu kaznu ako je primio ispunjenje obaveze, a nije bez odlaganja pismeno saopštio Dobavljaču da zadržava svoje pravo na ugovornu kaznu.

Na zakašnjela plaćanja Dobavljač će zaračunavati Naručilac zatezne kamate prema primjenjivom / pozitivnom propisu.

VIŠA SILA

Član 11.

Ako slučaj više sile, potpuno ili djelimično spriječi izvršenje obaveza po ovom okvirnom sporazumu, ugovorna strana zahvaćena slučajem više sile je obavezna da o nastanku slučaja više sile, o vrsti i o eventualnom trajanju više sile pismeno obavijesti drugu ugovornu stranu u roku od 7 dana od nastanka slučaja više sile. Ako se blagovremeno ne javi nastupanje slučaja više sile, ugovorna strana koja je pogođena tom okolnošću ne može da se poziva na nju, izuzev ako sama ta okolnost ne sprečava slanje takvog obavještenja.

Pod višom silom, u smislu prethodnog stava, smatraju se spoljni i vanredni događaji koji nisu postojali u vrijeme potpisivanja ovog okvirnog sporazuma, koji su nastali mimo volje ugovornih strana, čije nastupanje i djejtvo ugovorne strane nisu mogle spriječiti mjerama i sredstvima koja se mogu u konkretnoj situaciji opravdano tražiti i očekivati od strane koja je pogođena višom silom.

Kao slučajevi više sile smatraju se sljedeći događaji: rat i ratna djestva, pobuna, mobilizacija, štrajk u preduzećima ugovornih strana, epidemija, požar, eksplozije, saobraćajne i prirodne katastrofe, akti organa vlasti od uticaja na izvršenje obaveza i svi drugi događaji koje nadležni organ priznaje i proglaši kao slučajeve više sile.

Za vrijeme trajanja više sile obaveze ugovornih strana po ovom okvirnom sporazuma miruju, ne primjenjuju se odredbe okvirnog sporazuma o ugovornoj kazni, sa tim da se rok za izvršenje obaveza ugovornih strana produžava za period koji odgovara trajanju slučaja više sile i razumni rok za otklanjanje posljedica više sile.

Ukoliko slučaj više sile bude trajao duže od 10 dana, ugovorne strane će se sporazumijeti o daljnoj sudbini Okvirnog sporazuma. Ukoliko se ugovorne strane ne sporazumiju o sudbini okvirnog sporazuma, ugovorna strana kod koje nije nastupila viša sila ima pravo na raskid okvirnog sporazuma pošto o tome pismeno obavijesti drugu ugovornu stranu.

POVREDE UGOVORNIH OBAVEZA

Član 12.

U slučaju prekoračenja roka izvršenja usluge iz člana 5. ovog Okvirnog sporazuma Naručilac ima pravo raskinuti pojedinačni ugovor uz naplatu kazne radi pretrpljene štete zbog kašnjenja isporuke i kršenja ugovornih obaveza od strane Dobavljača.

Ugovorna kazna u visini od 1% vrijednosti pojedinačnih ugovora, odnosno narudžbenice, naplatit će se u slučajevima:

- Servisiranja neugovorene opreme,
- Neotklanjanja nedostatka odmah nakon zaprimanja obavijesti i
- Povrede drugih obaveza preuzetih pojedinačnim ugovorom.

GARANCIJA ZA UREDNO IZVRŠENJE OKVIRNOG SPORAZUMA

Član 13.

Dobavljač je dužan da u roku od 10 (deset) dana od dana zaključenja Okvirnog sporazuma dostavi безусловnu bankarsku garanciju za dobro izvršenje posla u iznosu od 10% vrijednosti Okvirnog sporazuma sa uračunatim PDV-om.

U slučaju da Dobavljač ne dostavi Garanciju za uredno izvršenje Okvirnog sporazuma u skladu sa odredbama iz tenderske dokumentacije, zaključeni Okvirni sporazum se smatra apsolutno ništavim.

PRIMJENA ZAKONA O OBLIGACIONIM ODNOSIMA

Član 14.

Ugovorne strane su saglasne sa primjenom odredbi Zakona o obligacionim odnosima i to u pogledu prava, obaveza i odnosa koji nisu regulisani odredbama ovog okvirnog sporazuma, a koji nastanu u vezi i povodom izvršenja ovog okvirnog sporazuma.

RJEŠAVANJE SPOROVA

Član 15.

Sve eventualne sporove i nesporazume koji bi mogli nastati iz ovog okvirnog sporazuma ili povodom ovog okvirnog sporazuma, ugovorne strane će nastojati riješiti usaglašavanjem, posredovanjem ili na drugi miran način u duhu uzajamnog povjerenja i dobrih poslovnih običaja.

Ukoliko ugovorne strane ne postignu mirno rješenje eventualnog spora u smislu stava 1. ovog člana, ugovara se nadležnost suda u Sarajevu, Bosna i Hercegovina, uz primjenu pozitivnog prava Bosne i Hercegovine.

OSTALE ODREDBE

Član 16.

Dobavljač nema pravo zapošljavati, u svrhu izvršenja ovog okvirnog sporazuma, fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke, najmanje šest mjeseci po zaključenju okvirnog sporazuma, odnosno od početka realizacije okvirnog sporazuma.

Član 17.

Izmjene i dopune ovog okvirnog sporazuma mogu se vršiti samo pismenim putem. Bit će punovažne i obavezivati će ugovorne strane samo one izmjene i dopune koje su sačinili sporazumno u pismenoj formi.

Član 18.

Ovaj Okvirni sporazum sastavljen je u 4 (četiri) istovjetna primjerka, od kojih 2 (dva) primjerka zadržava Dobavljač, a 2 (dva) primjerka Naručilac.

Pripremio:

Kenan Čengić, BA općeg prava – službenik za javne nabavke


Kontrolisale:

Amira Petrović, BA općeg prava - šef Odsjeka za javne nabavke

Amela Smajić - Džaferagić, BA općeg prava, - šef Odjeljenja za zajedničke poslove

Dobavljač
PROMA d.o.o. Sarajevo

DIREKTOR
Mirza Durmišević




Naručilac

Javna ustanova Opća bolnica

„Prim. dr. Abdulah Nakaš“

V.D. DIREKTOR

Prof. dr. sci. med. Ismet Gavrankapetanović



Broj: PI-66-05-21

Sarajevo, 06.05.2021.

Broj: 2534-b1/21

Sarajevo, 22.04.2021. godine